

BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
PREDSTAVNIČKI / ZASTUPNIČKI DOM
Komisija za vanjsku trgovinu i carine
Povjerenstvo za vanjsku trgovinu i carine
Broj: 01/3-50-1-3-17/08
Sarajevo, 17.3. 2008. godine



БОСНА И ХЕРЦЕГОВИНА
ПАРЛАМЕНТАРНА СКУПШТИНА
БОСНЕ И ХЕРЦЕГОВИНЕ
ПРЕДСТАВНИЧКИ ДОМ
комисија за спољну трговину и царине

Z A P I S N I K
17. sjednice Komisije za vanjsku trgovinu i carine
Predstavničkog doma Parlamentarne skupštine BiH,
održane 17.3 .2008. godine

Sjednica je počela u 14 sati.

Sjednicom je predsjedavala predsjedavajuća Komisije Snježana Rajilić.

Sjednici su prisustvovali članovi Komisije: Mehmed Suljkanović, Slavko Jovičić, Šemsudin Mehmedović, Salko Sokolović, Jerko Ivanković Lijanović, Jozo Križanović, Hadži Jovan Mitrović i Ekrem Ajanović.

Sjednici su, također, prisustvovali Sabrija Šerifović, pomoćnik ministra vanjske trgovine i ekonomskih odnosa BiH, Seid Uzunović, šef Odsjeka u MVTEO, Elma Kadić, službenik za saradnju s Parlamentarnom skupštinom BiH - OSCE, i Emira Češljarić, sekretar Komisije.

Na sjednici Komisije predložen je i, s pet glasova „za“ i tri glasa „protiv“, usvojen sljedeći

D N E V N I R E D

1. Usvajanje Zapisnika 16. sjednice Komisije,
2. Razmatranje Programa mjera za primjenu Sporazuma CEFTA, dostavljenog od Ministarstva vanjske trgovine i ekonomskih odnosa BiH, 18.2.2008., radi dostavljanja mišljenja Predstavničkom domu,
3. Razmatranje Nacrta zajedničke deklaracije predsjednika parlamenata zemalja članica CEFTA-e,
4. Razmatranje Prijedloga zakona o poljoprivredi, ishrani i ruralnom razvoju Bosne i Hercegovine, drugo čitanje,
5. Tekuća pitanja:
 - a) Zaključak Kolegija Doma u vezi s pismom EU delegacije Evropske komisije u BiH o Prijedlogu zakona o poljoprivredi, ishrani i ruralnom razvoju Bosne i Hercegovine.

Ad.1. Usvajanje Zapisnika 16. sjednice Komisije

Jozo Križanović imao je primjedbu da se u Zapisniku u tački 2. na drugoj strani njegove diskusije izvrši ispravka u smislu poboljšanja formulacije zadnje rečenice.

Zapisnik 16. sjednice Komisije s navedenom primjedbom usvojen je jednoglasno.

Ad.2. Razmatranje Programa mjera za primjenu Sporazuma CEFTA, dostavljenog od Ministarstva vanjske trgovine i ekonomskih odnosa BiH, 18.2.2008., radi dostavljanja mišljenja Predstavničkom domu

Predstavnički dom PSBiH je, na nastavku 13. sjednice, održane 5. 9. 2007., usvojio sljedeći zaključak:

“Obavezuje se Vijeće ministara BiH da zajedno s Komisijom za vanjsku trgovinu i carine Predstavničkog doma te u saradnji sa ostalim nadležnim institucijama na entitetskom i kantonalnom nivou osigura donošenje svih neophodnih mjera kojima će se zaštititi domaća proizvodnja i ublažiti negativni efekti primjene Sporazuma o izmjeni i pristupanju Centralnoevropskom sporazumu o vanjskoj trgovini (CEFTA 2006)“.

Vijeće ministara BiH je, na 24. sjednici, održanoj 27.9.2007., razmatralo navedeni zaključak i zadužilo Ministarstvo vanjske trgovine i ekonomskih odnosa BiH (u daljnjem tekstu: Ministarstvo) za njegovu realizaciju. U skladu s tim, Ministarstvo je sačinilo Program mjera za primjenu Sporazuma CEFTA koji ima dva segmenta: Akcioni plan za primjenu Sporazuma CEFTA s odgovarajućim prilogima i Komentar na odredbe Sporazuma CEFTA. Navedeni program mjera Ministarstvo je, 18.2.2008., dostavilo Predstavničkom domu na razmatranje i usvajanje.

Kroz tabelarni prikaz, u Akcionom planu za primjenu CEFTA -e Ministarstvo je navelo: aktivnosti, njihove nosioce i rokove, a odnose se na: opće mjere za povećanje izvoza i smanjenje trgovinskog deficita; mjere za privlačenje stranih investicija; program mjera iz oblasti agrokompleksa; mjere u oblasti sanitarne i fitosanitarne zaštite i program mjera za tehničke industrijske proizvode.

U raspravi su učestvovali: Jerko Ivanković Lijanović, Šemsudin Mehmedović, Slavko Jovičić i Jozo Križanović.

Jerko Ivanković Lijanović rekao je da je Program mjera dobro urađen i apostrofirao da je potrebno konstantno insistirati na korištenju zaštitnih mjera za stimuliranje poljoprivrednih proizvođača u okviru primjene odredbi Sporazuma CEFTA.

Šemsudin Mehmedović rekao je da stiče dojam da je Program mjera dostavljen samo da bi se zadovoljila forma. Postavlja se pitanje da li neko svjesno želi da proizvodi iz BiH ne budu konkurentni proizvodima iz regiona. Na Akcioni plan programa mjera za primjenu CEFTA-e dao je komentar na predložene aktivnosti koje se odnose na tač 2., 4., 13., 22., 25. i 33. i postavio određena pitanja predstavniku predlagača.

Jozo Križanović konstatirao je da BiH prilično kasno ulazi u pripremu mjera za primjenu Sporazuma CEFTA. Program mjera dobro je sačinjen ali je BiH nepripremljena za njegovu primjenu.

Slavko Jovičić predložio je pokretanje inicijative za izradu strategije o temi : „Bh. patriotizam kod izvoza“, u što bi se uključili MVTEO, VTKBiH i UIOBiH.

Na pitanja i sugestije učesnicima u raspravi odgovorio je, u ime predlagača, Safet Šerifović. Istakao je da postoji spisak mjera za necarinske barijere i da, u principu, država ne predlaže zaštitne mjere.

Na inicijativu Slavka Jovičića odgovorio je da je u tač. 6 Akcionog programa ova mogućnost predložena.

Nakon duže rasprave, Komisija je konstatirala da je: s urađenim Programom mjera i dostavljanjem materijala Ministarstvo zakasnilo; Program mjera trebalo predložiti prije stupanja na snagu Sporazuma CEFTA; te da je potrebno istrajavati u dosljednoj primjeni i provođenju njegovih odredbi.

Komisija je jednoglasno z a k l j u č i l a da u Mišljenju koji će dostaviti Kolegiju Predstavničkog doma predloži da usvoji Program mjera za primjenu Sporazuma o izmjeni i pristupanju Centralnoevropskom sporazumu o vanjskoj trgovini (CEFTA 2006.), s navedenim prijedlozima da:

- Ministarstvo dopuni Akcioni plan sa stavkom: primjenjivati član 23.bis Sporazuma CEFTA na prijedlog poljoprivrednih proizvođača i/ili udruženja poljoprivrednih proizvođača radi ozbiljnih poremećaja na domaćem tržištu, nastalih kao rezultat prekomjernog uvoza;

- Ministarstvo ažurira rokove predložene u Akcionom planu, te obavijesti Dom o realizaciji mjera za koje su istekli predloženi rokovi;

- Vijeće ministara BiH učini napore za osposobljavanje i opremanje državnih institucija, neophodnih za nesmetan izvoz bh.proizvoda;

- se angažiraju nadležne institucije za konstantno pružanje pomoći i dodatnu edukaciju bh. proizvođača kako bi jednostavnije izvozili svoje proizvode i tako bili ravnopravni sa izvoznici iz zemalja članica CEFTA-e. Isto tako, neophodno je preduzimanje odgovarajućih mjera kako bi se bosanskohercegovački proizvođači osposobili da budu konkurentni na domaćem i na tržištu zemalja CEFTA-e.

Ad.3. Razmatranje Nacrta zajedničke deklaracije predsjednika parlamenata zemalja članica CEFTA-e

Povodom održavanja Konferencije o temi „Euroatlantske integracije zemalja zapadnog Balkana“, održane u Budimpešti 28.9.2007., na sastanku predsjednika parlamenata potpisnica CEFTA-e, predsjednik NS Republike Srbije Oliver Dulić uručio je predsjedavajućem Predstavničkog doma Miloradu Živkoviću Nacrt teksta zajedničke deklaracije, te zamolio za sugestije, ideje i primjedbe.

Cilj sastanka bio je da se kroz parlamentarnu saradnju i demokratsku razmjenu mišljenja podrži ova važna regionalno-ekonomska inicijativa.

Predsjedavajuća Komisije rekla je da je Komisija na 16. sjednici realizirala obavezu prema zaključku 44. sjednice Kolegija Predstavničkog doma, od 12.2.2008., odredila člana delegacije i sačinila platformu za vođenje razgovora za uzvratnu posjetu delegacije Predstavničkog doma NS Republike Srbije. Navela je da članovi Komisije treba da budu upoznati s tekstom navedene deklaracije i rekla da je planirana posjeta za početak marta NS Republike Srbije prolongirana.

Nakon rasprave, imajući u vidu navedene razloge i odredbe člana 150. Poslovnika Predstavničkog doma, Komisija je jednoglasno z a k l j u č i l a da ne razmatra tekst Deklaracije i da je primi k znanju.

Ad.4. Razmatranje Prijedloga zakona o poljoprivredi, ishrani i ruralnom razvoju Bosne i Hercegovine, drugo čitanje

Snježana Rajilić rekla je da je dobila mišljenje Ministarstva poljoprivrede, šumarstva i vodoprivrede Republike Srpske na Prijedlog zakona u koji je po zaključku 16. sjednice Komisije MVTEO ugradilo amandmane koji su prihvatljivi.

S ciljem ponovnog usaglašavanja dijela amandmana predloženih na tekst Zakona potrebno je s obrađivačem Zakona ponovo razgovarati. Predložila je da se članovima Komisije podijeli mišljenje o amandmanima na Zakon, koje je na njenu molbu resorno ministarstvo Republike Srpske dostavilo 7. 3. 2008.

Konstatirano je da se Zaključak Kolegija Doma u vezi s pismom EU delegacije Evropske komisije u BiH o Prijedlogu zakona o poljoprivredi, ishrani i ruralnom razvoju

Bosne i Hercegovine iz tačke 5. odnosi na urgiranje za razmatranje Prijedloga zakona, te nema potrebe da se razmatra kao posebna tačka dnevnog reda, s čime su članovi Komisije bili saglasni.

U raspravi su učestvovali: Šemsudin Mehmedović, Jerko Ivanković Lijanović, Ekrem Ajanović, Hadži Jovan Mitrović, Salko Sokolović i Jozo Križanović.

Apostrofirano je da je krajnje vrijeme da se Zakon donese; da se amandmanima ne može mijenjati suština Zakona i da je do sada Komisija pribavila sve potrebne informacije i mišljenja na osnovu usvojenih zaključaka s dosadašnjih rasprava. Imajući u vidu da je Ustavnopravna komisija dala mišljenje da postoji valjan ustavnopravni osnov za donošenje Zakona; da su u izradu teksta Zakona učestvovali predstavnici tri ministarstva, da se mišljenje entitetskog ministra ne mora prihvatiti, potrebno je samo da Komisija ispoštuje poslovničku proceduru, razmotri Zakon, predložene amandmane i dostavi izvještaj Domu.

S ciljem usaglašavanja stavova i razmatranja predloženih amandmana na Prijedlog zakona, Komisija je većinom glasova usvojila **z a k l j u č a k** da se održi sastanak 26. marta 2008., **u 11 sati, u zgradi institucija BiH Sarajevo, Trg BiH br. 1.**

Dogovoreno je da se na sastanak pozovu predstavnici Federalnog ministarstva poljoprivrede, vodoprivrede i šumarstva; Ministarstva za poljoprivredu, šumarstvo i vodoprivredu Republike Srpske; predsjednik i sekretar Odbora za poljoprivredu, šumarstvo i vodoprivredu rukovodilac entitetskih parlamenata; rukovodilac Odbora za poljoprivredu, šumarstvo i vodoprivredu Vlade Brčko Distrikta BiH i predstavnik predlagača zakona.

U prilogu poziva za sastanak dostaviti tekst Prijedloga zakona, amandmane na Zakon i Izjašnjenje o amandmanima Ministarstva vanjske trgovine i ekonomskih odnosa BiH.

5. Tekuća pitanja

Imajući u vidu da je Zaključak Kolegija Doma u vezi s pismom EU delegacije Evropske komisije u BiH o Prijedlogu zakona o poljoprivredi, ishrani i ruralnom razvoju Bosne i Hercegovine razmatran u okviru 4. tačke dnevnog reda, za ovu tačku nije bilo pitanja.

Sjednica je završena u 17,15 sati.

Sekretar Komisije
Emira Češljarić

Predsjedavajuća Komisije
Snježana Rajilić